

Pistor, Johannes Albrecht

Ein gesprech vom Glück vnd ewiger ordnung, oder schickung, das man Fatum  
nennet, aller ding

Augsburg 1544

Res/4 Asc. 1232,35

urn:nbn:de:bvb:12-bsb10198574-2

VD16 P 2994



015007

\*\*\*\*\*  
Res. 4  
Asc.  
1232  
35  
\*\*\*\*\*

in Mann 217 70. Furtenfeld.  
Ein gesprech von glück und  
Ordnung.  
159



Johannes - -

4<sup>o</sup> Asc.

1232(35







2/2



## in gespräch vom Glück vnd

12  
Asc.  
1237  
35

vürordnung / oder schickung / das man Fatum  
nennet / aller ding / Erstlich durch den Erwürdigen Herrn

Johann Abt zu Fürstensfeld / in Latein beschriben / hernach von ein  
andern inns Teütsch Transferiert. M. D. XLIII.

BIBLIOTHECA

REGIA

SIS.









# INTERLOCV- TORES.

Theomachus. Didymus. Paracletus.  
THEOMACHVS.

BIBLIOTHECA  
REGIA  
MONACHENSIS

**I**n Gott wie vngleich  
geht es zu/das also zerrüt/durch  
ainander verwirrt/vnnd inn so  
vngleicher ordnung/widersins/  
die ganz Welt regirt würdt:  
Dann wir sehen/das dise men-  
schen/so am minsten der eer Go-  
tes dienen/inn allem frid rüwrig vn wol leben/die auch  
gar nichts arbeiten/allain irer faulkeit/vn leiblichem  
wollust aufwarten/gar kein ansechtung/mängel/noch  
kümmernuß/sonder allen rath haben. Hergegen aber  
die/so on vnderlaß sich zu Götlicher forcht/vnd seinem  
hayligen wort vnd Euangelio/in der liebe gegen dem  
nechsten üben/allain all ire gedanken auff Gottes wil-  
len setzen/dem vertrauen/vnd von seinet wegen sich  
leiden/Dise werden gestöckt vnd geplöckt/in gefenck-  
nuß/trübsal/armüt/angst/vnd noth/inn verliering  
haab vnd güts gepeiniget/geträngt/vnd bis auff das  
marckt genaget. Wo ist dann (daruon jederman vil  
schreit vnd sagt) die Götlich sorg/über vns arme men-  
schen auff erden? Was sagst du darzu/Didyme?  
DIDY. Ich sichs gleych wol/das es also zügeht/vn  
Beflag mich auch des nicht wenig/Derhalben hab ich  
A ij manches



manches mal nit ain klaine anfechtung / wird auch inn  
meiner Conscientz / gewissen / vnd allem gmüt / fast be  
trübt. THEO. Ich glaubs geren. DIDY. Da  
zú sehen wir vil menschen / die inn eytel hoffart / stolz /  
schand / sünd / vnd laster / alwegen jr leben verzert habē  
das sie ja zú den grossen eern kommen / herfür gezogen /  
inn alle herligkait gesetzt werdē / hohe gewaltige amp  
ter regiern / würdige Prelaturen erlangen / Inn kost  
lichen klaidern geziert / Samet / Seiden / vnd Purpur  
antragen / vnd darzú schier die ganze Welt regieren.  
Das darneben die frummen / erbaren / gelerten / vnd  
Gotseligē mensche / veracht / verschmecht / vndertrüct  
zú kainen eeren gebraucht / sonder allain mit armüt / al  
ler widerwertigkait / vnd bekümmernus gezwengt wer  
den / sich zú ewiger zeit / als der schaub am dach leiden /  
schmucken / vñ trucken müssen / Ja wilt du nit / so müst  
du. Das ist ain wunderbarlich ding / vnd züerbar  
men. THEO. Wolan / ich bit dich aber / auß was vr  
sach geschicht das ? waist du es / so sag mirs / Woher  
kompt doch ein solche vngleichait / menschlichs lebens ?  
DIDY. Ich ? das waiss ich gar nicht. THEO.  
Ey so ist auch billich / das niemand vmb dich / oder deis  
ne sachen wisse. Aber wilt du die rechten vrsach vonn  
mir / mit ernst hören vnd lernen ? DID. Ja / fürnem  
lich geren. Dann nichts magst du mir sagen / das ich  
lieber hören wolt / dann eben das. THEO. Wolan  
so merck. Alle ding inn der ganzen welt / nicht allain  
die vnlebendigen Creaturen vnd geschöpff / vnd vnuer  
nünfftige thieren / sonder auch was der mensch / als ein  
vernünfftige Creatur Gottes / wirckt oder thut / das  
würdt



würt alles durchs glück/vñ von der ewigen ordnung/  
oder schickung aller ding/ welches die Weysen Fatum  
nennen/geregirt/vnd nach des wolgefallen allain ver  
richt/daran du auch gar nichts zweiffeln sollest. DID.  
Es sey dann sach du vberweist mich / des mit ver  
nünfftigen/günten/gründtlichen anzaigungen/vnd ar  
gumenten/so würd ichs nimer mer glauben. THE.  
Glaubst du es nicht? Welcher König/Fürst oder ob  
herr/möchte ain solch schwere / vñnd grosse vnorden  
liche weiß aller ding/vnd der seiner herrschafft gedulden  
wo es nit von oben herab sein müste? Vnd dieweil nu  
Gott vnser/auch aller vnser sachen halbe/ein sorg tregt  
so solt er auch billich/nach gelegenheit der sünd/vnd v  
bertrettung/die Boshaftigen straffen / vñnd hergegen  
die frummen/mit gleichem werdt begaben. DID.  
Das ist warlichen so ain wunderbarliche sach / das ich  
auch offtermals zweiffel/ob doch Gott ja vnser geden  
cke. Aber schaw zů / dort kumpt daher Paracletus/  
den wollen wir hören / was er zů disem handel sage/  
ob er vns des entschaiden möchte. Paraclete /hieher  
zů vns/dann wir seind deiner vnderweisung / trost/  
vñ leer zum höchsten nottursfftig. P A R A. Was ist  
dann das? THEO. Ich wais nichts/mit der war  
hait zů reden/darinn ich deiner vnderweisung / oder  
trosts bedörffte/dann allain in dem/weil ich gewislich  
wais/vnd laß mich auch nit darab bereden/ dan dz all  
menschliche vñnd irdische handel / auff erden/inn der  
ganzen welt/nach wilfürlichem gefallen des glücks /  
vñ ewiger ordnung /oder schickung aller ding / gere  
girt werden. Hab ich nicht war? P A R A. Was



sagst du darzu: was ist dein mainung mein Didyme?  
D I D. Ich bin warlich in disem handel gar zweiffel-  
hafftig/derhalben würd ich billich Didymus / das ist  
ein zweiffler genannt. P A R A. O wol ein thieris-  
cher verstandt/der euch vnd vil andern menschen/ ein  
solches von Gott zügedencken/will geschweigen züsa-  
gen/inn sinn gibt/das doch kein Teuffel in der hellen/  
on sonderer forcht vnd erzittern mumlen dorfft. Ach  
Gott des jamers/dann durch ewer solche Gottslesteri-  
sche opinion vnd falschen wohn/ würt das ganz men-  
schliche leben/mit einem nebel vnd wolcken / zwischen  
ainem Labyrintho vnnnd irgang / der vernunft ver-  
finstert/Alle ding werden dardurch vndertruckt/ver-  
derbt/vnd zü nichten gemacht. Darzu werdenn alle  
ding/nemlich die von Gott/vñ der natur/ oder durch  
die Propheten/zur vñdweisung / vnd züzüchtigen des  
menschlichen geschlechts/geredt / vnd angezeigt seind/  
vergebens geachtet. Wißt jr nicht das die ewig ord-  
nung oder schickung aller ding/das fatum durch ain  
austruckung /etwz haimlichers also/spricht. Niemandt  
soll sich ohn mich vnderstehn/etwas güts andere leüt  
zü lernen/Niemandt soll auch dem andern volgen. Ich  
bins allain/ das jha alle ding hin vnnnd her treibt / übt  
vnd regiert. Also seind vileicht vergbens alle gesetz/  
vergebens das richter ampt/die Oberkait / alle straf  
vnd zucht/trewliche ermanüg/ Niemandt soll sich auch  
vor kainer peen besorgen/alle eer vnd herligkait/ seind  
eyttel/vnd vmb sunst/Darzu alle belonung/ deren die  
güts thun/vergebens. Darumb ob du auch arbeitest  
würd



würd es verloren sein / oder ob du schon feirest / wurde  
es dir kein schaden bringen. Was wird dir nutzen dein  
grosse arbeit? Schaut zu was für ein schönen ratsch-  
lag möcht jr / auß diser ewigen ordnung / oder schickung  
aller ding / empfahen? Gefelt euch nu vil eh diser thor-  
hait des nerischen verstands nachzuolgen / dan jr sol-  
chem trewlicher / seliger / vnd warhafftiger vnderwie-  
sen werden? THEO. Was ich mir zügelaußen für-  
genommen hab / das beken ich offentlich / mit hertz vnd  
mund / vnnnd halt auch nit / das es anders sein mög.

PARA. Wie aber du Didyme? DID. Desglei-  
chen halt ichs auch / vnd würd mit leichtlich anders zü-  
gelaußen beredt. PARA. Wolan so geschicht vns  
gleich / als wann ein frantzer mensch an allem leib bre-  
chenhafft ist / aller hilf der ärztet notturfstig / vnd wol-  
te darneben die ärztet / so im die ärzney beraitten / vnd  
geben bereden / das im solches gar nichts vonn nöthen  
were / damit er nit was schmerzen leiden müß / wolte  
also vil lieber inn solcher frantzhaytt verschmachten /  
vnd eh auß faulhayt / inn seinem freyen willen / jäm-  
lichen sterben / dann den güthen gesunden ratschlegen  
der ärztet / vnd irer kunst volgen / vnd gesund werden.  
Oder so eyn schiff müttwillig / on alle schifflait / für sich  
selbst / inn die höhe des Meers ablauffen wolte / ver-  
mainte es dörfste kaines schifflaiters / Patrons / oder  
schiffmeisters / vn̄ so ein fortun oder vngewitter keme  
das es sich an dē felsen / selbst müttwillig zerschmetern  
vnnnd zerstoßen liesse. Also geht es warlich mit vnns  
auch zu / weil wir den grund der warn vnderweisung  
verach-



verachten/so wurd als den der verstand des menschen  
an den gefarlichsten felsen/vnd Stainen / aller irrtüg  
zerstossen/versürt/vnd verderbt. Aber ich bitt euch/  
weil jr nun inn solcher obberürter opinion/frecher/ vñ  
Epicurischer bestreitung/ewers fürnemens verstri-  
cket seind/Wolt jr deshalben gar nichts zur notturst  
leißlicher narung (wil jezüd nichts von der seelen hail  
sagen) arbeiten? vnd solcher /wie jr sagt / ewiger or-  
dnung aller ding/jren gang lassen/jrer gebott folgen/  
vnd nachgeben? THEO. Ja wir sollens nachgebe  
vnd ist auch billich. P A R A. Ey so werde wir auch  
vnser diener/ob die schon vbel hädeln/vnbillich straf-  
fen/Dörffen die vngheorsamen auch mit schelten/die so  
ain vnMESSig/vnordenlich leben fürenn/gar nichts dar-  
von abweisen/vnser Kinder zu kainer zucht /vnd ge-  
horsame ziehen/die vnderthanen mit züchtigen/kainen  
für recht fordern/oder so er böß than hatt verklagen/  
darneben auch kainem gesatz vndworffen sein. THE.  
Jnn summa/es muß also gehn/wies das fatum /das  
ist/die ewig ordnung oder schickung aller ding / haben  
will/vnd schickts/Gott geß wir schlaffen/wachen/ar-  
beiten/oder gehn müßig. Ist gar nichts daran gelegē.  
P A R A. So darff auch s Baur kain Ros oder Och-  
sen inn den pflüg spannen/niemand darff hacken/reü-  
ten oder äckern/gar nichts seen/auch der zeit des Jars  
kain acht nemen/noch mit allem fleyß/der selbē irgend  
ain vorbetrachtung haben. Was wolt er die kelte/re-  
gen/gefrüre/hagel/pliz/doñer/vnd ander vngewiter  
des jars / so seer fürchtenn? Warzü solte er sein sägis  
wegen/die sicheln herfür süchen/Er darff auch nichts  
mehen/



mehen / schneiden / noch dreschen / gar nichts impffen /  
belzen / die Baumen rauppen / beschnaitenn / oder die  
Weinreben zaißen / Inn summa allerlay baurarbeit  
müßte er von jm legen / vnd was thun. Allain dahaim  
hinder dem ofen sitzen / birn bratten / faul sein / auff der  
pruck ligen / schlaffenn / oder zü zeitten / die lange weyl  
züuertreiben / spilen / kurtzweil süchen / singen / vñ nichts  
dan frölich sein. Dan wies die ewig ordnung oder schi-  
ckunge / aller ding verordnet hatt / Also kompt es vonn  
jme selbs / fület dir dein hauß vnd stadel / vnd gibt dir  
so genüg / das dir auch die gebratne Tauben / von jnen  
selbst willig ins maul fliegen. Schaut zü ewer hüpsch  
Fatum / ewige ordnung oder schickung aller ding. DI.  
Du lachest wol / doch ist es war / vnd nit anders / Dan  
gleicher weis die Parce / das seind drey Göttin / vonn  
den Heyden erdicht / vber alles menschlich geschlecht ge-  
setzt / die auch ainem jeden / sein bestimpte zeit / leben / vñ  
tod / verordnen / zü aller zeit spinnen / auch ire spindel /  
das ist das leben der menschen / wunderbarlich hin vñ  
her schupffen / Je mer sie arbeiten / je minder frucht inē  
darauf entspringt / also sollē wir auch hie von dē fato  
ewiger Ordnung oder schickung / aller ding / vritailen  
vnd halten. P A R A. O jr vn seligen thorechten mē-  
schē / wolt jr / so wil ich euch recht zeigē / wz die ewig ord-  
nung oder schickung aller ding ist / vñ vermag: DID.  
Ja ich wolts geren / vnd beger es zü hören. THEO.  
Souer du anders recht darvon waist / vñnd mit der  
Warhait züreden / aber souil mich gedunckt / so bekē-  
nest du selbs / das du gar nichts darumb waist / weil  
du so fast darwider bist / vñnd dich darab gleich erzür-  
nest /



nest. Doch so sag her. P A R A. Wolan so nemt hin  
weg auß der gemain aller mensche/die baurtschaft / als  
le handtierung auff dem Land vnd Wasser / die kunst  
der schiffleut / last alle handtwerck abgehn / das auch  
kein Schmid / Zimmerman / Maurer / Weber / Haus  
knap / vnd schußgesel / vnd gar kein handwercksmann /  
zu nutz vnser teglicher nartung / vund lebens mer sey / so  
werdt jr aller erst / was die werck diser ewigē ordnung  
oder schickung aller ding / das jr Fatum nennet / was  
auch die vnuerkerlichkeit aller ding vermag / recht vnd  
zum vberflus wol erkennen. O der lasset ja die hand  
wercker inn irem wesen / vund menge bleiben / wie die  
seind / auch andere handtierung inn irem werck bestan /  
Doch das kein mensch darneben nichts mit sorg / mit für  
rechtig sey / Menie sich keiner haushaltung an / sonder  
verlasse sich jederman auff das Fatum / ewig ordnung  
oder schickung aller ding / so würd der aller erst dises  
Fati / nutz vnd frucht erlernen. Darnach würd auch  
der / so sich auff das Fatum verlast / vnd im allain ver  
trawt / ein gewisse erfarnus seiner natur vund aygens  
schaft haben / wann er seine rent vund gült / den hauf  
zins geben / vnd die schulden bezalen soll / vnd aber er dz  
selbig nit vermag / arm ist / waist nit wo hinauf / nie  
mant gibt / leicht / oder vertrawt im / so kom er / vn such  
das Fatum / die ewig ordnung / oder schickung aller  
ding / haif ime gelt leihen / oder für in bürg werden / die  
schulden bezalen / vnd ime ledig machen. Schawet wer  
im antwort geß. Doch wolt jr lieber hörn was die hei  
ligen Muse vonn solchem Fato / ewiger ordnung oder  
schickung aller ding gesungen haben : D I D. Ja geren  
vnd vil lieber. P A R A. Also singen die. Wan



Wann nichts auff erden lebt ain frist  
Das aigner macht vergwiset ist  
Allain das fatum durch sein krafft  
An im hatt dise aygenschafft  
Dases ordnet/ vnd schickt all ding  
Nach seinem wolgefallen ring  
So ist vergebens vnser mühe  
Ja was auff erden ayner thū  
Kain frumbkait nuzt/ kain boßhait schade  
frey seind all sünd vnd missethat  
Auch welcher allzeit erbar lebt  
All seine tag nach tugent strebt  
Der solt darumb nit globet sein  
Weil im das fatum solchs gibt ein  
Vnd er darzü gezwungen würdt  
Kain dieß züstraffen vns gebürt  
Dann so er stilt/ das muß er thū  
Darzü in tringt das fatum schon  
Aber wer ist dem das gefelt  
Vnd nit willig nach eeren stelt  
Darzü in nichts nit treibt noch tringt  
Sonder sein aigen gwissen zwingt  
Wie wir dann sehen alle tag  
Ein jeder thut was er vermag  
fragt niemant drumß auß aignem müß  
Nach dem in solchs geduncket güt  
Wer sagt auch das es se sey recht  
So der Mörder ein mann erschlecht  
Vnd kompt darvon/ on alle büß  
Mainst du dases eben sein müß



Doch setz ichs hin inn Gottes macht  
Der alle ding waist vnd vor betracht  
Dann vnser weisheit ist vmb sunst  
Vor im ain thorhait on all kunst  
Er schaff vnd handle wie er wöll  
Dem menschen solchs gefallen soll.

Souil singen vns die Muse von dem Fato. THE.  
Noch würd deshalben dem Fato ewiger ordnung od  
schickung aller ding nichts genommen. P A R A.  
Schempt euch wie lang wolt ihr kynder bleiben / wie  
lang irret jr euch selbs / oder wie lang wolt jr doch vn-  
ser aller / des ganzen himels / vnd erden Herzen nit er-  
kennen? So das Fatum from vnd böß leut macht /  
warumb ziehet jr ewere kinder zur erbarkait / vnd güt-  
tem auff? Warumb laßt jr sie inn die schül gehn darin  
nen etwas zülernen vnd frumb zü werden? Warumb  
bestellet jr inen zü solchem / mit grossem kosten die schül  
meister? Warlicher sache es werden alle ding vergeßes  
sein. Vnd weil dann das Fatum reich vñ arm macht  
tugentsame vnd böse kinder zeucht / so solt jr sie gar nit  
gehn schül schickē / Was ist's von nöten. Warzū dorft  
jr inen souil haab vnd güts verlassen / euch so hart tag  
vnd nacht inn mühe vnd arbeit treiben / damit sie nach  
ewrem tod nit nort leiden müssen? Lassent nach / thüt  
nicht mer dergleichen / verlaßt inen kaine güter noch an-  
ders etwas / sonder Beuelhet sie allain dem Fato / das  
würd inen genügsam rätlich sein / für sie sorgen / inen ge-  
nüg geben / vnd kaim mangel lassen. Ich acht aber das  
niemand so nerzisch sey / der sich gantzlich darauff verlas-  
se.



se. D I D. Wie mich gedunckt / so verstehst du nit ge-  
nügſam die natur vnd art / der ewigen ordnung / oder  
ſchickung aller ding / du würdeſt ſunſt anderſt darvon  
reden. P A R A. Ich wiß gewißlich das ichs ver-  
ſteh. Dann ſo man inn minſten ſachen / auff erdē dem  
fato / vnnnd ſeiner macht nit vertraut / wie wolt man  
dem inn groſſen vnd wichtigen handlungen vertrau-  
wen? Vnd ſo das fatum nichts anders iſt / dann wie  
ir darvon ſaget / ſo laßt auch ewre kinder / neben vnnnd  
bey böſer geſellſchaft / auß wachsen / auch mit diſen inn  
aller boſhayt / büßerey vnnnd ſchalckhait wandlen / irer  
ſitten vnd preüch gewohnen. Dieweil doch das fatum  
vnd die drey Götting des lebens / der menſchen / Parce  
genannt / inen etwas verordnet habenn / das doch ſeyn  
muß vnd geſchehen / auch das niemand vmbgehn kan /  
ſo würd inen warlich kein böſe geſellſchaft / ſchendliche  
red / oder geberdt / ſchaden mögen. Darvor vns doch  
Sanct Paulus warnet / da er ſpricht zun Corinthern /  
Laßt euch nit verführen / böß geſchweß verderbt gute ſit-  
ten. Vnd weil ir je von diſem fato ewiger ordnung  
oder ſchickung / aller ding ſouil haltet / vnd daſſelbig ſo  
faſt defendirt / warumb dienet ir ander leütten / vnnnd  
andere herwiderumb euch. Was ſag ich aber vil von  
der Kinderzucht / weyl ir doch ewren knechten / die je  
zund zum verſtand kommen ſein / das minſt nit vber-  
ſehen? Dann je war iſt / das ir die ſelbigen nit allain  
ſtrafft / vñ drewet inen / ſonder vil mer mit aller forcht  
der peen / erfordert ir von inen alle erbarkeit / vnd ver-  
meidung des böſen / das ir auch darneben / das geſtirn  
oder Influentz des himels / darunder ſie geboren / ob ſy

B iij deſhalben



Defhalbē zūm bösen / oder gūtem geneigt seind / nichts  
betrachtet / vnd allain damit sie sich wol halten / frum  
vnd erbar seien / gar nichts an inen sparet. Warumb  
strafft jr zū zeiten den diener / der wider ewren willen  
thut / weil er an seiner mißhandlung / nit / sonder sein ge  
burt / das fatū / die ewige ordnung / od schickung aller  
ding / daran schuldig ist : Oder warumb lobet ihr ain  
menschen seiner tugent / frumbkait / vnd erbarkeit hal  
ben / weil jr doch selbs bekent / vnd spricht / das die ge  
burt vnd fatum / den menschen zū sollichem treibe :  
Darumb so mag diser eüwer mainung nach / gar nie  
mant weder frumb noch böß geachtet / noch minder ge  
lobt werden. Nun mercket zū / Wen ein Astronomus  
sternseher / Seomanticus / oder der gleichen künstler  
einer / ainem reichen mann sein Natiuitet machet / richt  
ime den Horoscopus seiner geburt auff / vnd zaigt im  
an / warzū er von natur / vnd der geburt halben / genai  
get sey / vnd wolte ine auch darneben bereden / es mö  
chte nicht anders sein / es müste eben disen gang / vnd  
lauff haben / dem nach der Planeten lauff / zur stand sei  
ner geburt gestanden were ic. Was gilt es / diser reych  
wurde nichts dest minder / von stundan seiner haup  
haltung / vnd handtierungen nachtrachten / das alle  
ding ordenlich verricht wurden / nichts verwarloset /  
das auch sein gūt täglich gemert / vnd nicht geminderet  
wurde / er wurd sich der Beschreibung seiner Natiuitet  
nichts bekümmern lassen / sonnder wo die wort an sei  
nem haup gesind nit helfen wolten / würd er die feüß  
darzū brauchen. Zū dem allem / würd er auch seiner  
aignen haupfrawen nichts verschonen / Nicht sag ich  
ob sie irgendt zū frech were / vnd ain vnzüchtig leben



füret/sonder wo sie allain oftermals/wider seinen wil  
len zum fenster hinauf gucket. Vnd so sie als dann zu  
im also sprech / Warumb schlechst du mich? Schlag  
die Venerem/die mich der geburt nach / auf krafft des  
Fati ewiger ordnung oder schickung aller ding / also zu  
solchem genaigt / geboren hatt. Maint ihr ob sich der  
mañ an die listige red des weibs wurde keren / vnnnd jr  
deshalben nachgeben? Nain / gar nicht / Sonder vil  
mer vrsach suchen / damit er der nârtisch eufferer seyn  
weib nach seynem willen / mit strichen züge / Gott geb  
wo das Fatum were. Also thûn dise menschen / die  
etwann vmb ire sünden gestrafft werden / das sie spre  
chen on alle scham / freuenlich / Sy habens müssen thûn /  
künden auch das nit lassen / jr natur tring sie darzu / als  
man gemainlich von Dieben sagt / das einer muß zu  
stelen haben. Darneben aber vergessen sie des / so die  
Weisen schreiben / nemlich / Die gestirn geben die naig  
ligkait / vnd nôtten doch niemand. Sehent jr noch nit  
zu was vnerstand euch die opinion des Fati ewiger  
ordnung oder schickung aller ding / treibt? Nemlich /  
das niemand von ime selbsts sündiget / niemand im selbsts  
ain abbruch thût / auß aygner krafft / das auch niemand  
durch seinen aignen willen / geizig / karg / geüdisch / frey  
gibig / gerecht oder vngerecht / zu loben / kain frummer  
zu eeren / vnd kain böser zu straffen sey. Inn Summa  
das alle tugendt vnnnd Laster / ganz vnnnd gar von  
der mitte aller menschlichen handlung hinweg / vnd  
irer macht genomien werden. Dann als jr darvon sagt  
so thût kainer nichts von ime selbsts / sonder was er thût  
das kumpt ime vnwissend anderstwoher / vnnnd würt  
darzu



darzū zwingen/ der mag auch weder gūtt noch böß ge  
scholten werden. Also ist auch der mensch vmb sunst  
inn dise welt geboren/ Er hatt auch vergebens ein ver  
nünfftige seel von Gott empfangen/ die mit solcher ho  
her natur begabt ist/ das der mensch durch sie alle ding  
so auff erden wachsen/ regiert/ vnd darüber herrschet.  
Ich sag auch nit das dise vernünfftige seel/ dem men  
schen/ wie jr vom Fato redet/ allain vergebens von  
Gott dem schöpffer/ aller ding eingegossen sey/ sonder  
vil mer/ das noch grösser ist/ ine zum grösten schaden/  
nachthail/ vnglück/ vnnnd zū seinem aignen verderben  
gegeben sey. DID. Nun wil ich auch se geren hören  
was diser sagen wöll/ vnnnd wie er doch beschliesse/ mit  
höchstem fleiß auff mercken. THEO. Aber ich fra  
ge nichts darnach/ was er sag/ ich gib nit ayn schneller  
darumb. P A R A. Wolan wer oren haß der höre.  
DID. Hast du nit vorgesagt/ das wir menschen/ mit  
grossen schaden/ vnd zū vnserm verderben inn diß ias  
merthal geboren werden? P A R A. Ja ich habs ge  
sagt/ ewer mainung nach/ vnnnd wil dir auch das noch  
deütlicher declarieren/ anzeygen/ vnd weisen. DID.  
So will ich auch solchs mit hohem fleiß von dir hörn.  
P A. Nun so bit ich/ du wöllest mich hörn. Ist's aber nit  
gar ain vnbequem vngschickt ding/ das ain mensch sei  
ner geburt halben/ zū solchem grossen vbel/ fahr/ vnd  
schade geboren/ vnnnd im end seines lebens widerumb  
nichts minder zū höchster not vnd pein getrunge solt  
werden/ das were je im anfang vnd end ein schentlich  
ding/ vnd zū fliehen souil vns möglich were. Darzū  
an im selbs alles vbelsein ursach. DID. Es sey dan  
sach



sach du werdest mir solchs mit anderen argumenten  
probieren vnd klerer anzeygen / so bleib ich gleich wie  
vorzweiffelhaftig. P A R A. So würdest auch bil  
lich Didymus genannt. Doch so merck auff / vñ wend  
alle deine gedanken jezund hieher. Es ist vns jeders  
man feind / vnd werden noch darzü gestrafft. Ist aber  
nicht das gantz vnd gar ain vngschickt ding / das diser  
dem vnrecht geschicht / vñnd gewalt leiden muß / aller  
erst darzü der straff / mer dann der eern würdig geach  
tet würdt. Deshalben müssen wir menschen / weyl dz  
Fatum mit vns also vmbgeht vnd handlet / wie jr den  
darvñ redet / vngerechtigkeit leiden / darzü still schwei  
gen / vnd nichts dest minder darumb gestrafft werde.  
Was kan doch je greülicher erdacht werden / dann das  
wir von denen zur straff verurteilt sollen sein / von wel  
chen wir erstlich vñbels züthün / vnd zühandlen gezwun  
gen werdenn. Das Fatum / die ewig ordnung oder  
schickung aller ding / hatt ayn Todtschleger gemacht /  
jezund herwiderumb / begert es sein leib vnd leben / zur  
straff / darumb das diser in inn solchem genolget hat.  
Gleycherweis / als ob ainer ein andern mit gewalt inn  
ain Brunnen stürzet / vñnd hernach in / deshalben das  
er hinaß gefallen wer / straffet. Wolan nun sehent zü /  
ob doch irgent etwas vngeschickters oder nãrrischers /  
vnd armseligers sein möcht / dann eben das / wo dem  
also were. D I D. Ich muß je bekennen / das dises ayn  
arme sach ist. P A R A. Ja / vñnd vil mer jederman  
züuerflüchen. Dann ein feynd verzeicht dem / so der et  
was / vñ ob das schon groß vnd schwer ist / wider ihn /  
doch mit vnwillen / vnd darzü gezwungen thut. Aber

C

das



Das Fatum kan niemant nichts verzeihen / auch denen  
nit / die im gehorsam sein vñ volgen. Noch minder ver-  
zeicht es disen menschen / die es zum vbel zwingt vñ nö-  
tiget / sond vil eh zeücht es die selbs zur straff / welche es  
zū vor reizet / vnd inen zū solchem ein vsach was. DI.  
Ey so wolt ich Gott / das doch das Fatum allain dem  
brauch vñ gerechtigkeit d mensche nachfolget / so es vñ  
aigner natur zur barmhertzigkeit gar nichts gneigt ist.  
THEO. Wie Didyme / woltest du auch an der weis-  
heit vnd vernunft des Fati zweiflen vnd abtreten?  
DID. Es sey denn sach ich sehe zūmal alle beide hend  
vnd fuß / vñ seitten des Fati / so würd ichs nit leichtlich  
glauben / auch von meiner mainung nicht abweichen.  
PARA. Du würdest bald sehen / laß dir die weil nit  
lang sein. Aber far für wie du angefangen hast / von d  
gerechtigkeit der menschen. DID. Alle mensche habē  
die gewonhait / das sie auß anmütiger sensftmütigkeit  
vnd gerechtigkeit / vnder vñ zwischen dem / das da frei-  
willig / vnd disem das nit mit willen geschicht / recht-  
messig vrtailen / aber das Fatum (sowil ich von dir je-  
zund versteh) strafft auch den seiner mißhandlung hal-  
ben / der ime mit aller dienstbarkeit vnderworffen ist /  
vnd in seinem gewalt gefangen leit. PARA. Darüb  
weil nun alle menschliche sachen / der gestalt gehandelt  
werden / so verwirt auch darneben die zenckische Göt-  
tin Erynnis / vnd der hellisch Teuffel / alle ding auff er-  
den. Dann so Gott nit ist / der solche sachen verricht /  
oder darnebē sorget / so muß je ein anders sein / das alle  
ding regirt. Darzū ist vnmöglich / das inn so grossen  
menge



menge viler wunderbarlicher / vnd vnderſchidlicher  
ding / das fatum / die ewig ordnung oder ſchickung al  
ler ding / zu aller zeit gegenwertig ſey: THEO. Ein  
weiß vnd klüger mann biſtu Paraclete / Lieber ſag mir  
wem gehört diſe fürſehung zu: P A R A. Niemand den  
dem höchſten vnd ainigen Gott / wider den du ſo ernſt  
lich ſichſt vnd ſtreiteſt. Dann ſo Gott nit were / der di  
ſes alles erhölt / wie möchten ſouil ding ein beſtand ha  
ben / Vñ ſo er einig iſt / der alle ding fürſihet / wie wol  
ten dann die ding / die er erſchaffen hatt / herwiderum  
von ime veracht werden. Aber ſo ir vermaint das / dz  
Fatū alle ding regir / ſo verklagt auch kein eebrecherin /  
ir ſolt auch kein dieb nit ſahē / ob ir in ſchon an der that  
ergreiffet / weil er je ſolchs nit auß im ſelbs thūt / wie ihr  
ſagt. THEO. Wir ſagen war vñ liegen nichts dar  
an. P A R. Wolā ſo habt kein acht auff ewre ſach.  
Dann ſo die ſelben alle inn der hütt des Fati ſtehen / ſo  
würdt nichts deſt minder geſchehen / was geſchehen ſoll.  
Werffend von euch all ewer gold vnd ſilber / habt kein  
auffſehen auff ewer hauſhaltung / ſehend nit nichts auff  
ewer knecht / Kauffmanschaft / oder was ja in der ge  
main auff dem marckt geſchicht / es kan nichts ſched  
lich / noch anders widerſarn / denn wie es das fatum  
haben will. THE. Wilt du vnſer dan ſo gar ſpote:  
P A R A. Ach mein Gott / wer wolte doch diſer nerri  
ſchen handlung nit lachen: Dann du ſelbs mein Theo  
make / verachſt dz vrtail des Fati / weil du ſo gar nichts  
das ich geſagt hab / hören magſt. THE. Was du plo  
derſt / wiß ich nit / nimis auch nit an. P A R. Wißtu es

C ij nit:



nit? Waist du aber das/ wann dein geburt / vnd In-  
fluentz des himels/oder iha das fatum/die ewige ord-  
nung oder schickung aller ding/je so krefftig were/das  
es allain alle ding auf erden regiert/ Was dörsstest wir  
vnser glaubens/oder Gottes? Vñ darumb so durch  
das fatum alle ding regiert werden / so handeln wir  
auff erden frenenlich/vnnd on alle vnder schaid/ Die-  
weil durch das fatum alle eer/lob/schand/sünd / scha-  
den/gesatz/vnd vrtayl zünichten / vnd auffgehebt wer-  
den. Nun mein Didyme/hastu die seitten / hend vnd  
füß des fati gesehe? Welches gewalt ist nichts anders  
dann ain gefencknus/vnd sein macht ain mauffallen.  
DIDY. Ja ich hab gesehen vnd griffen / Beken auch  
das ich bisher Betrogen worden bin. P A R A. Das  
sey Gott lob vnd eer. Aber du Theomache / würdest  
nit auffhören darwider züstreitten/dem du doch nicht  
widerstehn kanst / noch absigen. THEOM. Wie  
das glück vnd fatum/die ewig ordnung oder schickung  
aller ding wöllen. P A R A. Ey sie werden dir den sig  
lassen/aber langsam gnüg. Ist ihm nit also Didyme/  
hab ich nit war? DID. Ja warliches ist also. Aber  
doch/mein Paraclete/Weil je Gott allain weiß vnnd  
güt ist/vnnd alle ding nach seiner volltümlichen weiß-  
hait regirt/so verwunder ich mich/warum er doch die  
frommen so hart zum offternmal peiniget/vnd den bö-  
sen so lang vbersicht/vnd irer gnedig verschont. P A R.  
O mein Didyme/lieber Didyme/ wann du ain rechtē  
verstand hettest/so fragtest du dem nit so fleissig nach/  
Dañ denen sachen/die vnserm verstand züschwer sein/  
vnd Gott allain vorbehalten/sollen wir züwissen nicht  
nach



nachfragen/ damit wir vns nit versteigen/ vnd in gröf-  
sere irrtum̃ einführen. D I D. So ist's auch besser ein  
ding mit eeren nit wissen/ dann halb vnd vbel künden.  
P A R A. Ja warlicher sach/ Dann wie das/ so ainer  
ain ding nit waist/ nit mag gestrafft werden/ also hat  
dises/ wann ainer ain ding vbel waist/ vnd lernt keyn  
verzeihung. Doch wil ich dir das mit gnaden Gotes  
ain wenig baß anzaygen/ Nemlich/ warumb doch Got  
etwann ainem menschen lang vbersicht / vnd sein ver-  
schont/ Darneben aber ein andern/ wie du gesagt hast  
strafft. D I D. Ich bitt dich sag mir's bald. P A R A.  
Hastu auch etwan den Psalter hörn lesen oder singen?  
D I D. Ja täglich. P A R A. Das ist recht. Nun  
was singt der Psalmist / da er spricht/ Psal. xciiij. Wol-  
dem / den du Herzzüchtigest/ vnd lereſt ihn durch dein  
gſag / das du ihm gedult gibſt zur bösen zeytt/ biß dem  
Gotlosen die grüb beraitet würdt. Hast du nicht hie  
den rathschlag Gottes/ warumb er der bösen verschon  
biß das dem Gottlosen die grüb beraitet werde. Vnd  
du wilt in jezund verdamen vnd vergraben/ eh im die  
grübe gemacht würd/ weil man noch greßt / lieber eyl  
nit/ laß dir der weil. D I D. Was ist's aber/ dz er sagt  
mein Paraclete/ so lang dem Gotlosen die grüb berai-  
tet würdt. Welchen sündler versteht er hie/ ainen men-  
schen allain? P A R A. Nain gar nit/ sonder das gāz  
menschlich geschlecht/ Nemlich der sündler/ hoffertigen  
vnd stolzen/ derhalben hatt er gleich daruor gesagt.  
Erheß dich du Richter auff erden/ vergilt den hoffer-  
tigen nach ihrer that. D I D. Was maint er aber mit  
dē/ so er sagt/ Dz du im gedult gibſt/ biß zur bösen zeit.



Welliches ist die böse zeit: P A R A. Darin die Got-  
losen vermainen sie grünen jetz/ vnd inen sey wol / vnd  
darneben die gerechten inn kummer auß vnd trübsal  
stehn. Aber die arbeit der gerechten/ ist eyn gaisel des  
Gotlosen/ vnd her gegen glück vnd hayl der Gotlosen/  
ist jr aigne grube. Doch will ich nicht / mein Didyme/  
weil er den gerechten gedult gibt/ bis dz dem Gotlosen  
die gruben bereitet werde/ das du in nârrischer mainung  
gedenckest/ er hab seine engel/ oder gaister/ mit hawen  
vnd schaufflen/ auch andern instrumenten bestelt / das  
sie an ainẽ besondern ort ein grosse grübẽ graben/ vñ da-  
her in ainem lecherliche argument möchtest sprechen / so  
du vor dir die grosse menge der Gotlosen betrachtest/  
wie groß muß dan diese grübẽ sein/ die ein solchẽ hauffen  
der Gottlosen fasset/ vñ also darauff woltest schliessen/  
Gott würde der langen zeit halben/ die grüben zũ gras-  
ben/ gezwungenn/ das er der bösen verschonenn muß.  
Darumb mein Didyme solt du gar nicht solches geden-  
cken/ will geschweigen reden. Ist in nit also/ das die  
grüben der sündler nichts anders ist/ dann die glückselig-  
keit der Gotlosen hie auff reden: Daren sie warliche  
zũ letzt als inn den dieffesten schentlichsten Brunnen ver-  
fallen werden. D I D. Dz ist ein wunderbarlich ding  
Paraclete/ das die glückseligkeit soll ein gruben der sün-  
den genennt werden. P A R A. Es ist warlich der  
recht namen. Dann Gott der Herr verschont vñ sieht  
mit sonderlicher vnd haymlicher fürsehung seiner Göt-  
lichen gerechtigkeit/ dem zũ/ den er für ain sündler vñ  
Gotlosen erkent / daher so geschicht als dann / das der  
schuldig dest stolzer wird. Welche hoffart vñd erhö-  
bung



hung /wiewol sie dem sündler ein herlich ding vñ auff  
steigen zur seligkeit gedunckt /aber so wirs mit gerechte  
vrteil wollen außörtern / so stürtzt diß den sünd zum ab  
grund / vñ dieffesten verderben. Derhalben hatt der  
Psalmist /die glückseligkeit der boßhafftigen vnd Got  
losen /recht vñ wol ein grüben gneñt. DID. Du hast  
vberflüssig genüg von dem hoffertigen vñ Gotlosen ge  
redt. Nun sag weiter mein Paraclete / was haltest du  
von den demütigen /vnd gedultigen menscheñ PAR.  
Hergegen werden die /so sich gleich vnder die erden in  
demüt schmucken / zñ letzt biß zñ den stern des himels  
erhebt. DID. Nun was sagst aber /das die sollē thū  
die teglichen gepeiniget werden. PAR A. So sie ge  
tröst werdē / sollen sie rüwig / vñ zaum werdē / vñ weil  
sie im gsatz des Herren gelernet /auch vnderweisen sein /  
sollen sie ire hertzen on vnderlaß gegē dem Firmament  
des himels erheben. Dann gleicherweis die grossen  
gestirn vnd Planeten / iren lauff mit allem fleiß vñnd  
beständigkaytt täglich verbrungen / auch darneben  
nichts achten / was ihu die menschen mütwillig hand  
len / Also sollen auch dise menschen die täglich gepeini  
get werdenn / gar nichts achtenn / was der mensche  
wider sie handle / sonnder dasselbig gantzlich verach  
ten. DID. Woher werden sie aber so fast getröst /  
das sie das thūn mögen PAR A. Von wann weil  
ain jeder mensch nichts dann fleisch vnd blüt ist / so sein  
die so gepeyniget werden / nichts dest schlechter oder  
böser / dann eben die / von denen sie also vñndertruckt  
werden / Dann Gott der Herr hatt für die vñnd ihene  
das fleisch an sich genommen / der auch die vñnd ihene



inn fünffrige zeit / zu seinem Richterstul vnnnd examinen  
fodern würdt. DID. So schaw zu / wann nu Gott  
etwas dem bösen vor außgethailt hatt / würt er gewis  
lich den gläubigen vnd frommen iren thail behalten.  
PARA. Darumb so du gepeiniget würdest / sey ge  
dultig vnnnd rüwig / gleicherweiss wie man sagt / Gott  
wils also haben. Daher geschichts mein Didyme / das  
die bösen zu zeiten grünen / in allem glück schweben / vñ  
darneben die frommen gepeiniget werden. Dañ Got  
waist allain / wie er vber ain jeden vrtailen soll / vñ hat  
solchs vor langest bey im beschlossen. DID. So ist  
des halben der ain vngüttig / wild mensch / welcher im  
der gütte des Herrienn / seinem gewalt / machte vnnnd  
gerechtigkait / als des waren vnnnd gerechten Richters  
zu widerstehn / fürnimpt. PARA. Du sagst recht  
von der sach. Aber höre zu ein wunderbarlich gericht.  
DID. Was ist das Paraclete? PARA. Je mer sich  
der stoltz vnd hoffertig / wider Gott setz / souil dest ge  
waltiger würt er von Gott verstossen / vñ also gehling  
inn ein erschrockliche dieffe gestürzt. Aber eyner der  
demütig ist / vnnnd je mer er sich nidert / souil dest höher  
würt er von Gott erhebt. DID. Gott ist hoch / vnd  
vber alle himel erhebet. Der auch alle Chör der En  
gel vberhöcht / vnd vberschreit / wer kan dann vnder  
den menschen zu ime kommen? PARA. Wein vn  
uerstanden thorechts mensch / redest du also von disem  
handel? Ich will nit das du dich zu tod streckest / vnnnd  
zur höhe Gottes auff steigest / sonder ich rathe dir selig  
flichen / damit du inn solchem strecken / durch hoffart /  
nit zerschmölest / ernidere dich / vnd leid alle widerwer  
tigkait



tigkait mit gedult vnnnd güter hoffnung / so würd er  
selbs zu dir herab steigen. Verstehst du yetzund war-  
umb er der bösen so lang verschont vnd nachgibt?  
DIDY. Noch nit genzlich. P A R A. Vnd das ist  
der bösen vnd gottlosen grüß. DID. Jetzund verste-  
he ichs vnd mit grosser verwunderung. P A R A.  
Schlag dir auß dem sin alle sorg vnd ansechtung / dan  
Gott sagt zu dir / wie vnd warumb dem gottlosen ein  
grüben bereitet werde / geth dich nit an züerforschen.  
Das lerne allein auß meinem gesatz das du gedultig sei-  
est / so lang biß dem gottlosen die grüß bereitet würd.  
DID. Das ist ye ein selige ermanung. Aber mein Pa-  
raclete / weil ich dich alwegē ein trewen mensche erkent  
hab / so wil ich dir etwas vertraulich in dein hertz al-  
lain sagē. P A R A. Wolan so sag frey on alle forcht /  
was du wilt. Vertrau mir als dir selbs. DID. Es  
seind (das Gott klagt sey) etlich menschen / zu denen ich  
mich irs güten trewen gemüts halben nit wenig alle-  
zeit versehe / denē ich auch offtermals nit wenig dienst-  
barkeit erzaigt hab / die seind yetzund also vnd anckbar  
gegen mir / das sie nit allein mir / der ichs vmb sie ver-  
dient hette / güts hergegen zu erzaigē sich befleissen / sun-  
der vil mit allerlay vnbilligkait / schmach vnd verdruss  
hören sie nit auff mich on vnderlaß zu peynigen. Von  
wanē her mainstu mein Paracletee dz dises entspringt?  
P A R A. O Didyme Didyme / du gehest noch na-  
hent auff der erden / aber so du dein gemüt in die höch-  
richten woltest / wurdest du disen schlechtē sachen / als  
ein thörichter nit so genaw nachfragen. DID. O  
wie selig bin ich / das ich noch auffgericht vnd vnderwi-

D sen



sen werden mag. P A R A. Warumb soltest du O  
Didyme nit auffgericht vnnnd vnderwisen werden?  
Dann ich allain wil mich meines ampts an dir gepra-  
chen/ damit du zum trost vnd weisheit erhebt vnd vnder-  
wisen werden mögst/ vnd wil dir den rechten weg  
zaigen. D I D. Du thüst wie deinem namē gezimmet/  
vnd wol ansteht. P A R A. Ich laß geschehen mein  
Didyme/ das diser menschen vndanckbarkeit/ von  
welcher leüt erbarmait des lebens wir vns vil getröst  
vnd verhofft hetten/ die auch teglichen bey vns mit es-  
sen vñ trincken freuntlich gewont haben/ yegund aber  
vns gehaß seind/ solt du darinn nit erschreckt werden/  
das jr feindschafft raicht mehr zur meynung vñ ge-  
win der eeren vnd tugendt/ dann das es vns schädlich  
mög sein. D I D. Das hab ich auch offtermals im  
Chor singen hören: Aber noch ains wil ich von dir er-  
fragen. Ob doch von dem güttigen aller Besten Herrn  
vnserm Got/ solch vbel so ich leidē muß/ verhengt wer-  
den/ vnd zu was end das geschech. P A R A. Hab  
ich dir nit erst gesagt/ das du den herrischen fragen zu  
vil anhangest. Wiast du nit das alle die ding/ so vns der  
gestalt begegnen/ von Gott kommen? Gott hat das  
vbel nit erschaffen/ er ist auch des kain vrsach/ aber er  
verhengts zuzeiten. D I D. Warumb verhengt ers  
aber also/ mein Paraclete? P A R A. Gott geprauchet  
das böß zu einer prob des gerechten/ wie er dann den  
Teuffel brauchet wider den Job. D I D. Ist auch et-  
was das in disem leben der bösen halbē gehandelt wer-  
der? P A R A. Ja jr ort ist hie nichts anders/ als der  
ofen ist deren Goldschmid/ darinn die kolen darumb  
ver-



verpriant werden/damit das gold vnd silber deſter rei-  
ner werde/Also verhengt Got den böſen gottloſen das  
ſie gegen den anderen wüſſen vñ Tyranniſiren/damit  
die gerechten erkant vnd probirt werden. Auf den bö-  
ſen macht Gott ſein geyſel / gibt inen die eer/ gewalt/  
macht vnd herligkayt / dardurch die frommen vñnd  
gottſeligen geſtrafft vnd gepeiniget werden. Also wer-  
den aller menſchen ſachen gehandelt vnd geordnet/wo  
die frommen nit halſtarig vnd trüzig/ſonder gedultig  
werden. Verhalben mein Didyme ſey getröſt / dann  
der gottloſ würd auff den gerechten ein auff ſehen ha-  
ben/vnd wider in mit den zenen grißgrammen. Aber  
der Herz würd irer ſpotten. D I D. Ach Gott was  
hör ich da? ſag mir mein Paraclete / wenn oder mit  
was geſtalt würd der Herz irer ſpotten? P A R A.  
Gott der Herz würd ir ſpotten / dann er ſicht das ir  
tag kompt. D I D. Was für ein tag? P A R A. An  
dem er einem yeden nach ſeinen wercken den lohn  
geben würd. Vnd den ſünder würd er verſpotten  
des er hie auff erden ein zeit lang verſchont hat/  
Was ſagſt du aber Didyme darzü / mainſt ob dir  
der gottloſen vngerechtigkait ſchaden mög / vñnd  
inen gar nit? D I D. Nain das acht ich nit /  
Dann vn möglich iſts das die böſhait / ſo durch  
neid / haß / vñnd feindtschafft / mir zü ſchaden vñnd  
nachthail von einem andern zügericht iſt / nit ee in-  
wendig ſchedlich ſey/dem der mirs außwendig be-  
raitet / dann mir. P A R A. Du ſagſt recht  
von der ſach / Dann deinen leiß truckt allain die wi-  
derwertigkait vñnd der vnſal / aber ſein gemüt vnd  
D ij ſeel



el verwundet die boßhait. Vnd alles das er dir zübe-  
rait/das würd auff in selbs widerumb hinder sich ge-  
rohen. DID. Daz acht ich auch. P A R A. Was  
wilt du dann weiter? DID. Von disem handel gar  
nichts mehr. Dann yetzund waif ich das die verfol-  
gung so mir vom gottlosen bewisen würd / inme sched-  
lich ist / vnd ich von der ledig vnd absoluiert bin / vnnnd  
das er darob zü letzt zü schandē werden muß. P A R A.  
Welchem mainstu das es schedlicher sey? Der gottlos  
hat dich in seiner wütereiey deines güts beraubt. Welch  
er hat des mer schadens / der das gelt / oder der den gü-  
ten glauben verleürt? Die mögen allain vmb die ver-  
lorne eer / trawen vnd glauben bekümmert sein / denen  
ire inwendige augen des hertzens offen stehn. Dann  
das gold kan yederman dem schein nach sehen / aber  
den glauben vnd trawen allain ir wenig. Darzū yeder  
man hat augē darmit er das gold sehe / aber dardurch  
sie die erbarkeit vñ güten glauben anschawen / haben  
sie gar nit. Dann so sie dise augen auch hetten / wurden  
sie warlich den güten glauben ehe ansehen / vnd also  
den vil mer vor augen haben vnd lieben. Die gottlosen  
trewlosen menschen wann inen kain glauben gehal-  
ten würd / so schreien sie / O wo ist der glaub / wo ist der  
glaub yetzund? Vnd darneben üben sie alle trawlosig-  
keit / neid vñ haß. Noch lieben sie güten glauben / allain  
darumb das man inen den erzaig / nit das sie disen her  
widerumb ander leütten beweisen. DID. Darum  
werden alle die / so die gerechten menschen verfolgen  
mit größerm schaden / vnd verderben gepeiniget / von  
wegen das in inen ir hertz vnd sin zum bösen gewendt  
vnd



vnd verfert würdt. P A R A. Du Beschleüß recht al  
so. Dann nach irer Bosheit würd sie Gott verflüchen  
vnd straffen. D I D. Es ist ein groß ding das von  
der gottlosen mütwillen vñ peinigung/so sie gegen vns  
erzaigen / vns souil nutz entspringt/welchs doch nit ir  
güter wil oder gütthüung / sonder ehe vnser aigner  
streit vñ kampff genent werden mag. P A R A. War  
lich Gott strafft vns durch die bösen / er gaiflet vns  
durch sie/darmit wir das Himelreich erlangen/Dann  
also gaiflet vnd strafft er ein yeden den er zum sun vnd  
miterben auffnimpt. D I D. Vnd souil ich sihe / so  
würdt den bösen dest mer glück vnd wolfart / zñ iren  
vnd grösserer verdammus hie auff erden vergunt / vñ  
hergegen bekumpt den frummen nichts dann angst/  
noth/verfolgung/ peynigung vñ anfechtung/welches  
dann inen zur kron der seligkait ein merung ist. P A  
R A. Gott ist ye güt / vñd wann er zñzeiten diser  
weltlichen seligkait/nit ein traurigkait/vnsal oder laid  
darein mischet/so würdet wir ime alles gutes verges  
sen / vnd er herwiderumb vns als die vndanckbaren  
darumb zñ straffen schuldig sein. D I D. Also pro  
birt vnd übt Gott die frummen durch die bösen/vñd  
durch deren Tyranny vnd verfolgung zñchtiget vnd  
lernet er die gottseligen. P A R A. Allain üben die  
gottlosen Boshaftigen menschen das/ so inen Got ver  
hängt / vnd ir ein klaine zeyt verschont. Warumb aber  
das geschech / fragst du vileicht? D I D. Ja gewis  
lich. P A R A. Nemlich darumb/das einer sprechen  
mög/ Der Herz ist mein zñflucht worden. Schaw zñ/  
du würdest kein solchen schatz oder zñflucht suchen/

D iñ wo



wo du nit in gfar vnd sorgen stündest: vnd aber darv  
umb bistu in sorg vnd gfarlichait kummen / damit du  
vmb hilff schreiest / vnd dir ein züflucht suchtest. Ist im  
nit also / yetz so magst dir recht vnd billich schreien. Die  
boßhait der gottlosen ist mir ein angst vnd pein wor  
den / aber als ich durch solchem ein anfechtung getriben  
ward / hab ich angefangen / ein schutz vnd züflucht zu  
suchen / welches ich in der weltlichen wolart vñ glück  
seligkait veracht hab. DID. Darumb auch / wie  
du vermainst / so ist der nit zu aller vñ yederzeyt Gott  
ingedenck / der alwegen in glückseligkait / gegenwertig  
ger gütter / freuden vnd trost hie auff erden lebt / vnd  
ob denen sich erfrewt. P A R A. Das ist ye war.

DID. Derhalben so ist billich / das alle weltliche  
hoffnung abneme / auff das dise die Gottes ist / züne  
me / vnd zu vns kum. P A R A. Es ist ye von notten  
das dises geschech. Dann du traurtest von des wegen /  
das dir der Herz dein züflucht würde / vnd Gott ein  
beystand vnd schirm deiner hoffnung. Vnd darmit du  
in deiner hoffnung nit verzweifflest / so ist er gegenwer  
tig da / verhaist dir / richtet dich auff / vnd messiget dir  
mit kurtze vnd lieblichkait alles vbei vnd widerwertig  
kait die du hie leiden müst. DIDY. Ich müß das ye  
Bekennen mit der warhait. Dann ich bin noch inge  
denck / das die Muse etwan also gesungen haben.

Nit stürzt das glück dich ye so fast

Dases dir laß kein ruh noch rast

Vnd nimmer mer werdest erhebt

Zu dem das in der höch her schwebt.

La



Es versucht ob du seyest ein man  
Ermant dich dein/ vnd rürt dich an.  
Darmit du nit vergessest dein  
Lern dich zütragen angst vnd pein  
Zü dem günt es dir alles güt  
Weil es sich ernstlich stellen thüt  
Darumb verzag nit/ hab gedult  
Dardurch erlangst sein gunst vnd huld.

P A R A. Auff disen deinen sententz hab ich ein  
spruch auß hailiger schrifft/ der sich ganz wol hie her  
reimt. Nemlich spricht Paulus/ Ein trewer Gott ist  
vnsrer Herr/ der euch nit weiter in versuchung fallen  
last/ dann das jr wol ertragen möcht. Doch gibt er  
der versuchung ein solchen aufgang vnnnd end/ das jr  
kündet bestan/ vnd standthafft pleiben. D I D. Jetz  
felt mir noch ein anderer sententz ein/ Nemlich also.

Welcher das glück veracht mit rath  
Vnd widersteht jm mit der that  
Der fürt eins weisen mannes sin  
Vnd nimpt der tugent hohen gwin.

P A R A. Das ist yewol geredt. Dann also geth  
der mensch in den fewrigen ofen aller bekümmernuß/  
nit daser zerstoßen vnd prochen/ sonder dzer gesterckt  
vnd vollkommen werde. D I D. Noch hab ich ein  
spruch diser deiner mainung nit vngleich.

Lehr



Lehr mit gedult all angst vnd noth  
Ernstlich zu leiden bis in todt.  
Dann ewig wert das leiden nit  
Es hat ein end / vnd kumpt zum frid.  
Vnd weil du mit gedult ferst für  
Gedenck das alweg vor der thür  
Ein ander vil mehr leiden muß /  
So würd dir alles vbel süß.

P A R A. Nun aber mein Didyme / der / den du für  
vngerecht achtest / darumb das er der bösen so lang ver  
schont / sichst du nit das er gütig vnnnd trew ist gegen  
dir / weil er aller dein hoffnung ein hohe züflucht / bey  
stand vnd hilff worden ist: Mainst nit du mögest dar  
auf ein grossen trost entpfahen: D I D. Ja fast feint  
lich. P A R A. Darumb so du etwan sichst ein bösen  
vnd gottlosen menschen frolocken / in stolz vnnnd hof  
fart erhebt / zu grossen eeren gepraucht werden / regis  
ren / von yederman ehrlich gehalten / reich vnd gewal  
tig am vermügen / vnd aber hergegen das widerspil  
an dir / da du yetz vberfallen / betrübt / vnd geängstiget  
würdest / so bitt ich dich / das du in kainen weg geden  
ckest / du seyest derhalben verworffen / veracht / vn̄ ver  
schmecht von Gott dem allmechtigen / sonder gehe in  
dein aigen gewissen / zäme deine gedanc̄e / damit dich  
nit ein trawrigkeit betrüb / anfechte / oder gar ver  
zweifflet mach. Sihe vnd Betracht die / welche noch  
mehr vbel vnd kümernus gelitten vnd vberstanden ha  
bē / wie du yetz und vor einer klainen weil selbs Bezeugt  
hast / auch noch auff disen tag leiden / das du auch nit  
hailiger



heiliger noch besser/dann dise alle/seyest. Wieuil men-  
schen ligen auff den heütigen tag in gefängknussen/die  
Gott vil angenemer seind/dann alle die auff erden ge-  
nüg/vnd in keiner sacht irgent ein mangel haben/son-  
der ganz frey sicher vnd wol leben. Wieuil kinder/lie-  
ben iren vatter von hertzen / der sie doch teglichen  
schlecht / strafft vnd streicht? DID. Vnd billich/  
wann wir anders der hailigen schrift glaubē wollen.  
Dann welchen Sun der vatter liebt / den strafft er  
auch. P A R A. Das ist ye warer dann irget etwas  
anders. Darumb so du ein Sun begerest zū sein eins  
trewen vatters/so lieb in so er dich strafft / also wür-  
dest du dann mit liebe bezalen der dich lieb hat. Daher  
kumpt es/das vil frummen menschen/mit gedultigem  
gemüt Gottes straffe leiden vnd entpfahen / vnd ime  
deshalben danckbar seind/in keinen weg darin verza-  
gen/noch erschrecken werden. DID. Mich verwun-  
dert aber nit wenig / das Gott der Herz / weil er ye so  
fast liebt/das er mich nit allain von den vndanckbaren  
also veracht vnd verschmecht werden last / sonder das  
er mich yetzund vor langst mit dem hagel vnd pliz so  
seer verderbt hat / das ich vor menigklich ein graw vn-  
scheüch bin. P A R A. O Didyme Didyme/was für  
ein grosser irtum dringt dich zū deinem eignen verders-  
ben vnd schaden. O wie hert vnd langsam bist du im  
glauben. Wilt du dem willen Gottes / oder seinem ge-  
fallen ein ordnung geben vnd fürschrreiben? Sichst du  
nit das auch die menschen dergleichen gegen iren kin-  
dern handlen/dz sie die vngeratne kind/bey denen kein  
hoffnung ist/die sich nimmer ziehen lassen/lassen vmb-  
gehn



gehn/handlen vnd leben nach irem gefallen. Aber die/  
zü denen sie ein freud/lust vñ hoffnung haben/sie wer-  
den sich erbar vnd wol halten/die straffen sie / vberse-  
hen inen nichts/vnd wo die wort nit erspriessen/Brauch  
en sie die rüthen. DID. Deshalben geschicht/das dis-  
ses kind/das sein vatter nach seinem willen leben last/  
würdt auch zuletzt vom vätterlichen erb außgeschlossen?

P A R A. Ja warlich/dann dises kind strafft vnd  
zücht er / welchem er die erbschaft vergunt. Vnd in  
dem das der vatter das kind strafft / nimpt er es auch  
zum erben auff/vñ verwirffts gar nit. DID. Dar-  
umb sollen wir billich mit gedultigem gemüt eines sol-  
chen trewen vatters strach vñd straff gedulden.

P A R A. Ja fürnemlich. Darumb mein Didyme  
wolt ich nit das du eins solchen wancelen vnd kindisch  
en siñs werest/das du bey dir selbsts murmlet sprechest/  
ja mein vatter hat meinen brüder lieber / dann mich/  
darumb verhengt er im allen willen / mich aber / wo  
ich das minst wider seinen willen thū / oder sein gebot  
vbertritt/so schlecht er. Du solt dich vil ee vnder der gai-  
sel deines vatters frewen/das du durch die liebe vñd  
mit höchstem fleyß zur erbschaft deines vatters / er-  
weckt/genommen vñd gezogen würdest. Dann er  
strafft dich ein zeit lang/aber er verflücht dich darumb  
nit/zü ewig zeiten. Aber die/denen er ein zeitlang vber-  
sicht vnd strafft sie nit/die selbigen verflücht vnd ver-  
last er in ewigkait. Das Gott die frommen strafft / das  
ist zeitlich. Vnd das er der bösen hie verschont/ist auch  
zeitlich. Nun aber nim die wal / ob du lieber woltest  
zeitliche mühe vnd arbeit/oder die ewigen straff/oder  
ja die weltliche glückseligkait/oder das leben das ewig



lich on ende wehret. DID. Wer wolt so nerzisch vñ  
vnbesint sein / das er nit im ee erwelen wolte / das doch  
bestandhaft vnd ewig weret? Aber mein Paraclete  
weil ich dich als ein trewen vnd guten freund erken /  
vnd glaub auch du seyests / so wil ich nochmals kain  
scheuch haben / dir die haimlichkeit meins hertzens zu  
entdecken. P A R A. Was ist das? DID. Ich hab  
gedacht bey mir selbs / dz ich mich yezund gantz vñ gar  
auf gutem glauben / vñ in brünstiger begird meiner seel /  
mit Gott versönt / vñ mich ja ime allain ergeben hette /  
auch all mein leben teglichen zur besserung aller meiner  
handlung / sitten vnd gepreuch gewent / so wird ich dar  
neben on vnderlaß mit schwerer straffe / von der gaisel  
Gottes gestrafft / derhalben hart bekümiert / vnd sche  
me mich auch / von wegē des gehen vrtails des böfels /  
das dann nicht anders gedencet / allain mir seien souil  
straff / angst vnd not von wegen meiner sünden auffge  
legt. P A R A. O Didyme Didyme / du bist noch nit  
recht klug vñ weiß. Ich bitt dich / sag mir ains. DID.  
Was? P A R A. Bekümiere dich auch vmb des ge  
mainen böfels reden / vñ sagen? DID. Ja / wie es dan  
menschlich ist. P A R A. Vil ee solt du dich im Herrn  
trösten / dan du solt wissen / dz alle / die da in Gott leben  
wollen / verfolgung leiden müssen. Lieber ich bitt dich  
hab kain acht auff des schnöden böfels vrtail / dz dann  
von dem gerechten vrthail Gottes an aller weitesten  
abgesundert ist / vñ fast betrogenlich / fehlt auch nit sel  
ten. Der ist warlich selig / der hie auff erden sein sund ab  
büßt / vñ vmb der selbigē wegen die straff willig gedul  
det / der mag als dan von hinnen bewert / probirt / rain  
vnschuldig vñ wol abschaiden. E ij DID.



D I D. Wie wann Gott der Herr die sünden hie zeit-  
lich strasset / möcht auch der rain mensch on alle sünde /  
neben dem gottlosen / vor dem zornigen angesicht Got-  
tes in gleichem val das vrtail vberstan? Ich wais wol  
du sagst nein. P A R A. Du gedenckest recht. Dann  
Gott strafft ain ding nit zway mal. Dann so Gott der  
Herr hie auff erden die sünden all strasset / was wolte  
sein vngründtliche barmhertzigkait in der künfftigen  
zeit vnd welt handlen? Was förchst du dann der men-  
schen vrtail? hast nie gehört was der Poet sagt.

Mainst das dir Gott verziehen hab  
So der plitz schlecht von oben rab  
Vnd trifft ein aichbaum neben dir  
Geth an dein hauß on schaden für.

Lieber all die sich irs nechsten vnglücks frewen / die  
sollen gewislich dencken / das ir aigen vnglück inen vor  
d thür stehe vñ wachs / also geschicht dem böffel dz vber  
dich ein solchs vrtail fellen wolte. D I D. Ju / o frewet  
euch all mit mir. Jetz hab ich gewislich meins gots vnd  
Herzens seiten griffen / auch die wundē an seinen hān-  
den gesehen / yetz glaub ich on zweiffel / wil auch in / der  
mich strafft vnd gaiflet / erst recht lieben. Dann er  
nimpt mir die rach / vnd erhelt mich gleich als bey ei-  
nem zaum / er allain handlet / alle ding / gleich so wol  
das süß als das bitter / so mir hie auff erden begegnet.  
Also zeucht er mich von der höhe / in die nidere / nimpt  
mich zu im / vnd von aller boßhait / die doch böser ist /  
dann das ewig sewr / erlöst er mich gnediglich / vnd  
macht mich frey. In disem trost bin ich yetzund getröst  
vnd glaub erst recht. Ich glaub von ganzem meinem  
herzen



herzen vnd befeß mit dem munde / das Gott als ein  
güttiger trewer vatter / für das hail seiner kinder / al-  
le ding ordne / verheng / thū / vnd verhüt. P A R A.  
Darumb so du sichst das ein böß mensch reich würd /  
erschrick nit / vnd wann du ein frummen sichst in angst  
vnd trüßsal / entsetze dich nit / Dañ dort in dem reichen  
wont die straff / da aber die kron der seligkait. D I D.  
Ich kan auch yetz das nit verschweigen / das ich in mei-  
ner jugent von den Musis gelernt hab / also.

Das fliegend glück regirt allain  
Die welt / durch auß in aller gmain  
Vnset sein gang / falsch ist sein steg.  
Im augenplick verkert sein weg  
Dem bösen gnaigt / dem frummen gehaß  
Vn vndercheid / on vnderlaß  
Mit tracht es ob die sach sey recht  
Den Herin machts zu einem knecht  
Erhebt zu eeren manchen man  
Der vor nie nichts güts hat gethon  
Ders nit verdient / dem istis günstig  
Der wirdig wer / dem istis gheßig  
Das macht / das er in blindhait yrt  
Darumb seine füß irit seind verwirrt.

P A R A. Derhalben so krönt Gott der Herr das  
selbst die krieges vnd Triumfschreienden / vnd daselbst  
verwürfft er auch vnd schafft von ime ab alle die sich  
hie frewen. Dann vnmüglich ist das ein böß mensch  
so gar vol bößhait steckhe / das er ja nit etwan ein finck  
lin des güten in ime hab / Herwiderumb würd auch  
niemand so frumb erfunden / der nit ein dück vnd böse  
ader / begird der sünden in ime hab. Also geschichts / dz  
so der böß in allem glück selig vnd wol hie auff erden  
lebt / das diß zu seinem verderben vnd schaden raicher /



das er auch hie auff erden ein widerholung eins klainen  
güts entpfahē / vnd dort in irer welt gestrafft werde.  
Aber der frumb leidet hie alle widerwertigkeit / zur  
straff seiner wenigen vnd klainen sünden / damit er her  
nach in ewigkeit getröst würde / vnd seligklich lebe.

DID. Darumb so geschichts auch / das kein kriegs  
man oder künstlicher fechter sein sterck vnd geschicklich  
ait brauche ob dem tisch / da im allerlay essen vñ trinckē  
fürgetragē würdt / sunder er spart solichs / Bis er kumpt  
zum kampff vnd streit. P A R A. Gar recht sagst du.  
Dann das sich einer auff essen vnd trincken verlaß / vñ  
tröste sich des / dz gehört einem wollustler zū / nit einem  
fechter. Der sein ware kunst im staub / hitz / vnder der  
sonnen / im schweiß / geferlichkeit / angst vnd nott übet.

DID. Das ist yewarlich ein recht werck eines  
kampffs vnd streittes / darzū der rechtē wunden / vnd  
schmerzens. P A R A. Ein solchen kampff streitten /  
die / für nichten achten ob sie schon von dem menschlichē  
en vrtail geurtailt werden / die auch alle trübsal diser  
zeyt / für ein ringe bürden achten / vnd darzū alles güt  
diser welt wie dz korn scherzen. DID. Zū disem spruch  
reimpt sich auch / das ich von den hailigen schwesteren  
den Musis / da mirs der Gott Apollo / sang / gelernet  
vnd entpfangen hab / Also.

Democritus auß freiem müt  
Het an klainer narung vergüt  
Deshalben er das glück veracht  
Zū aller zeit nach tugent tracht  
Ein erbar gmüt für reichthumb groß  
Zū loben ist on vnderlaß  
Dasselb nichts anders tag vnd nacht  
Dann auff das himlisch hat ein acht

Nichts



Nichts weltlichs nimpts in seinen sin  
Für gold liebt es der tugendt gwin  
Nain forcht des lebens in jm ist  
Frölich/on sorg zü aller frist  
Sie ewig ordnung aller ding  
Acht es für nichts/vnd ganz gering  
Sein krafft an Gott dem Herin steht  
Der ist sein schutz wie es jm geht  
Vnd wañ jm schon hie vbelß gschicht  
Hat es sein straß gehn Hünel gricht  
Da pleibts vnd wont in ewigkait  
Bey Gott/allem vnglück zü laid.

**PARA.** Nun merck mir auch zü/was ich auß di-  
ser deiner schül gelernet hab. **DID.** Wolan ich wils  
hören.

Hör auff/flag nit vber das glück  
Obs dir beweist zü zeiten dück  
Nit darumb istß dir feind glaub mir  
Bist du gdultig/du gneüßst sein schier  
Wer hofft den würd gegeben vil  
Hoffnung belont recht zeit vnd zil  
Der thö: verzweiflet an der that  
Wann er Gott nit vor augen hat.

Ich wolt/mein Didyme/ dir zü einem trost noch vil  
sagen mögen / wo vns die zeit nit anders wo hin for-  
dert/vnd wir müßig weren. Darumb müß ichs yetz  
und bey disem berüw lassen. **DID.** Doch sollē wir nit  
von ainander schaiden on sundere dancßsagung Gott  
dem Herin/ Derhalben weil er allain vnser Her: vnd  
Gott ist/sollen wir billich in lieben/ vor augen haben/  
jm auch all vnser thün vnd lassen beuelhen / er würd  
für vns wachen / vnser schutz vund beystand sein.

**PARA.** Wolan so sprich mit mir also.

Gleich



Gleich wie die wällen in dem mehr  
Die schiffleüt führen in gefehr:  
Das schiff zerstoßen grausamlich  
Ertrenckens oft vngstümiglich  
Welches Pyrrhus versuchet hat  
Da er bekriegt die gwaltig stat  
Tarentum/des gleich Olysses  
In vngwitter lernet solches  
Da er von Troia flüchtig zog  
Aus wassers nott schwerlich entploch  
Also stehn wir menschen auff erd  
In angst/anfechtung/not/vnd gferd  
Armseelig/nackhend vnd auch ploß  
In gferligkeiten ganz trostloß  
Darumb O Herz vernim die flag  
On dich vnß niemant helfen mag  
Verleih vns gnad das wir mit gwalt  
Durch dich hie sigen manigfalt  
Nach disem leben erlangen  
Die ewig freud zu empfangen  
Mit deinen hailgen in gemain  
In dich hoffen wir ye allain  
Bekennen dich von hertzen grund  
Dir sey lob/eer zu aller stund,  
Amen,

Ende des Dialogi

Gedruckt zu Augspurg durch Heinrich Steiner/  
im M. D. XLIII. Jars.

















